



海防纂要卷之九

黎陽王在晉明初甫纂

男會苾穉芻甫

較明

紀捷

望海埚之捷

永樂十七年倭船入王家山島傳烽至總督劉江率
精兵疾馳入望海埚明日倭數千人分乘二十艘直
抵馬雄島圍望海埚江發伏出戰遣奇兵伏山下斷
其歸路倭奔入櫻桃園公合圍斬首七百四十二捕
生八百五十七自是倭大創迄今不敢犯遼東召封

廣寧伯

吾學編



海防集要 卷之九
王江涇之捷

嘉靖三十四年四月

國家地廣治極文禔武嬉海壖姦商乘時盜販因緣忿怒轉爲寇賊民不覲兵爲日旣久望風奔潰莫之誰何賊旣連得利內附外連聲應氣合徒黨滋蔓動以數千萬計又善用兵能以少爲衆所徵四方材勇慎伎武力之士率殲其手勢若烈火燄燄狡焉思啓蓋自壬子春更癸丑甲寅恣行轉掠戕殺燔燒叢萃藪窟新故環迭而兩浙三吳之禍變慘矣乙卯春柘林巢賊積增至萬餘人出掠嘉善諸處夏四月劇賊徐海麻葉等探知嘉杭兵調松江搗巢率衆數千人

水陸竝進聲言先攻嘉興次及杭時故巡撫李公留守杭總督軍門在華亭無兵可恃軍民洶洶甚懼御史梅林胡公方巡浙東台溫諸郡得報連日夜馳詣嘉興會賊從嘉善來前驅迤邐薄城外衆益懼甚公曰兵法攻謀爲上角力爲下矧又無兵乃密屬吏取酒百餘甕鑽其顛投以毒劑塞如故載兩船選兵卒機警而猛者假冠服持赤牘坐船上稱解官解酒餉軍載向賊所從道見賊卽褫去冠服走賊信不疑馳報諸酋長諸酋長得酒大歡相率高會痛飲率多死已又令村市酒家皆入毒甕中約償以直民所有米

清藥水泚而遺之賊往往爭取飲餒輟又死然賊黨尚衆我兵寡且恒怯適保靖宣慰彭蓋臣所領土兵數千人至可使胡公策其恃勇犯忌使人傳語之曰賊善伏且知分合我兵常爲其誘宜分竒正左右翼擊防其衝圍蓋臣不聽乘銳直前果遇伏墮賊計挫於城南石塘灣始大悔遂有潰志遠近震駭大失望胡公深憂之曰如是我技窮矣於是親詣軍營宣諭且勞告之曰勝負兵家常事惡足介念凡爾所以償者以不知地利中其伏我聞賊酋多死衆絲棼無紀且久不得食息暇可攻若等無畏顧兵多無衣與器

械乃使人悉索諸質肆故衣頒給之加賜錢帛牛酒飲食召諸金木工晝夜繕造器具懸重賞苗兵感激思奮察可用乃指畫石塘地形曲折曰汝宜以兵若干爲前鋒從塘路進若干爲竒兵伏道左水兵船若干環列道右防其逸皆後前鋒數里候賊將至某處前鋒迎敵佯敗走俟其過伏伏盡起三面夾擊蔑不勝矣蓋臣如公策賊果僨敗北走平望平望故別有苗兵營賊不知會總督張公從松江兼程來視師而永順宣慰彭翼南復從泐湖西出胡公又同督察趙公部署叅將盧鏜等厲激之且躬擐甲胄徑馳馬趨

出 回合圍軍聲遂大振賊大沮還走王江涇旣連
疲於奔又餒且病矧無統紀遂大潰不支土兵與我
軍乘之斬倭首二千餘級墮溺水死者不可勝校蓋
自是嘉興杭人始安枕軍民主客始知賊猶人非真
若鬼神雷電虎豹然不可嚮邇浸有鬪志賊亦自是
稍稍顧忌逆氣狂謀漸以虧胸始可誘而圖矣嗟乎
竒變決而波才破洛澗襲而淮淝捷嘉山合而博陵
奔蓋自昔禍亂之興必有忠義材武韜鈴之臣以指
揮擘畫救寧戡定蓋天所以奠安維極綏輯神人鴻
德好生常假手乎鉅公偉人實爲之孰云其果夢夢

哉武進左子好論次當世事而謂故所收公私牘牒
所載王江涇戰功淆無紀屬余詮次余爲詮次而歸
之庶後經世者有考焉

平望之捷

嘉靖三十四年五月

嘉靖乙卯夏五月官兵敗賊於吳江之平望先是永
保之兵旣皆失利賊遂肆意猖獗一西北入太湖犯
常州一西南犯杭嘉湖其犯杭州者至塘棲二宜慰
復失利賊掠北關去欲由蘇州入海道吳江之平望
浙直鄉兵會擊之賊腹背受敵大敗走松江至三店
我兵邀擊之斬首七百有竒中毒死者千餘人是戰

也巡按御史胡公宗憲副使董士弘僉事王詢以浙
兵至叅政任環知府林懋舉以直隸兵至而三店則
推官劉泉功居多皆不藉客兵之援由是而專任鄉
兵之議興矣嗚呼客兵之用豈得已哉蓋彼之獷狃
不馴非素有禮義之習我之恩威未洽難責以忠愛
之心恤之過則驕操之急則變勝敵不足以償其掠
民之害厚賞不足以稱其邀求之私前方城宗氏論
之詳矣雖然寇攘猝起民不知兵慮客兵之禍而徒
驅民以戰如投羊於虎是畏溺而避舟者耳故調客
兵者一時之權恃客兵而忘練鄉兵者非經遠之策

調客兵而練鄉兵兵可用矣而後酌勢之緩急敵之
多寡以處客兵遣之則我無乏用之嫌留之又存以
制其反噬之毒我師梅翁之底定東南也外立戰勳
內鮮兵變今日遣客兵數千而賊無玩心明日來客
兵數千而民無懼色者用此道也彼謂客兵必不可
用而又無練募之法者吾不知其所終矣

太學生俞
獻可撰

陸涇壩之捷

嘉靖三十四年五月

嘉靖乙卯夏五月松江柘林之寇千餘人流突李塔
匯歷張庄小崑山趨泖湖而北保靖宣慰彭蓋臣兵
追之抵蘇州之陸涇壩壩離城十里而近兵備副使

海防集要 卷之九 五
任環督兵擊之擒其梟帥俘斬五六百級水火死者不計屍盈阡陌婁水爲赤殘寇僅二百人值暴雨追之不克逸歸柘林嗚呼往歲倭賊覘我無備揚帆深入視吾蘇不啻几上肉耳是捷也論者皆謂我兵有死之心無生之氣而又益以蓋臣善戰之兵其勝宜也愚謂不然戰之日續親見之矣撫巡乘城督兵傳餐寇矢如雨自婁門以東達於陸涇壩我衆連呼戰者三日今日我任父對敵所不捐生以報者有如此日由是士氣百倍總兵俞大猷并二宣慰兵三路並進奮勇夾擊遂收全功當是時使非任公身先督戰

則吾不知民之僇力者何如使戰而弗勝則鼓寇之怒其慘吾又不知何如也抑陸涇蘇之東境也前此浙江巡按御史胡公宗憲有王江涇之捷則蘇之南境後此提督都御史曹公邦輔有橫涇之捷則蘇之西境未幾任公復有三丈浦之捷則蘇之北境一歲而賊四衄於蘇蓋自是而蘇無倭寇矣

崑山舉人李績撰

橫涇之捷

嘉靖三十四年八月

嘉靖乙卯秋八月倭賊自象山登嶼流突南京焚安定門殺一把總一指揮走無錫而南都御史曹公邦輔引兵馳護 孝陵因追及於蘇州之許墅賊驕蹇

益甚公與副使王崇古僉事董邦政知府林懋舉知縣康世耀把總婁宇曰此賊勢埒數千勅敵我地形兵力爲彼所窺他日大舉入寇何以支之誓滅此而後入城乃分授信地申主客應援之規以崇古邦政宇率指揮張大綱武生車梁躡賊所向遇敵先登爲正兵懋舉世耀各領兵屯吳林廟之左北護郡城南扼賊衝爲援兵嚴家兵左哨沙兵右哨分突衝截爲奇兵度賊走太湖募水兵于湖濱東山巡檢領船數十往來探哨爲遊兵又度賊不走太湖必分踪以牽制我師或棄金帛于道餌我嚴諭毋離伍毋拾遺士

皆股栗殊死戰賊至吳林廟我兵擒斬二十七人餘走楊山迤至靈巖奪民船由新港出太湖欲走洞庭見我兵旗幟不敢渡復登岍至橫涇前馬橋匿一民舍我兵圍而火攻之賊潰出遁伏田禾中不能得車梁捫其所殺人肉尚未寒又草露未動乃令衆大呼賊在此賊果驚出遂俘斬之無一人得脫者而大綱手刃數人力盡死之始賊之在無錫也欲尋徑常熟往附柘林之賊劫二人前數十武導之常熟在無錫之北二人給之而南且道辟行人曰賊至矣報官兵賊已陷絕地速來可盡擒也賊比敗恨二人入骨競

海防集要 卷之九
嚮割之嗚呼是賊以五十三人馳突八郡轉戰三千餘里所過皆不焚掠唯與敵者殺之此其勢其志可知也已非曹公之定策群有司之戮力蘇松之禍未已也雖然張大綱之死敵二人之給賊其功固非碌碌者惜二人之姓字不傳爾

崑山縣學生龔良相撰

後梅之捷

嘉靖三十四年十一月

嘉靖乙卯冬十一月倭賊自福建福寧州之連江洪流入浙境越平陽仙居至寧波奉化與錢倉賊合幾七百人深入紹興勢益滋蔓提督都御史胡公宗憲親督兵備副使許東望容美土目田九霄同知曲入

繩等兵往戡之遇賊江橋僅隔一河公謂諸將曰賊見我不顧而南其氣未可乘若稍止觀望可圖也吾茲試之乃於馬上自持一幟作指揮狀賊果聚觀公笑曰此易與耳乃令兵渡河九霄邀其前入繩襲其後賊見兩兵迭至大怖而走至後梅匿民家公復大笑曰賊若乘我兵半渡迎擊勝負猶未可量今已投死地復何能爲乃悉衆圍之三匝縱火焚之死者強半值天雨公與將士立田中夜五鼓大霧咫尺莫辨賊乘黑衝典史吳成器軍成器故善戰驅兵四面奮擊之擒斬復若干人然脫走者猶衆公計賊必由山

西嶺而遁嶺之巔可伏也命設伏以待夜將半賊果至遂大敗之斬首及焚死者積五百二十有奇餘奔太平蒲岐港官兵復追之賊堅壁不出乃夜偪賊壘投以霹靂火器謹若劫營者賊驚起自相攻擊死者又若干人得脫者無幾竟出洋去丙辰春正月也時公新膺簡命未浹旬輒有奇捷如此

烏程縣學教諭張節撰

清風嶺之捷

嘉靖三十四年十一月

嘉靖乙卯冬十一月倭舶三艘躡南鹿之西麓提督都御史胡宗憲預設海艦封守甚固二舶不能入揚帆而東其一西走我兵躡之沉其舟追入畧內相持

八晝夜賊窘甚從山後竊划船逸去颶風驅回登劫大畧至三港守備劉隆千戶劉綱百戶張澄戰歿於陣賊勢復熾遂越金鄉趨台州以漸北向時公方奏樂清之捷會台州告急公笑曰寇來有三敗我皆得之不足平也初寇登平陽守將不循約束故得深入今台守譚綸干城之將且素受方略賊玩踪其疆一兵法小敵之堅大敵之擒寇方得志三港其氣驕我兵方捷於樂清其氣勁以勁乘驕如拉朽耳二容美兵精悍甲諸部萬里從征朝氣正銳但初未諳險阨今授以布伏邀擊之法則爲全勝之技三遂命分道

布截天台以南綸兵當之新昌以北容美兵當之綸
兵逼壘而進以興史吳成器統部健爲前哨報効吏
章延廩爲後哨百戶王世仁陳濠督健卒伏於小江
道左知事張東督鄉兵伏於顏坑諸處而又迎賊所
向預置藥蜜藥餅餌之由是賊或中伏或中毒擒獲
三十餘顆傷死者不計始悔入台州境十二月抵新
昌知應台關有備去至岷縣三界上館嶺會容美兵
陳而待田九霄以正兵當其前田九章援兵繼進左
翼則留守王倫伏兵當之右翼則經歷畢爵伏兵當
之指揮吳江率部兵遶賊後背夾擊且多張旗幟爲

疑兵以撼賊勢賊四面受敵且戰且走我兵追之入
清風嶺烈女祠俘斬一百七十餘是縱也賊二百餘
徒歷温台紹三郡始克勦滅其敢於深入者由恃紹
興之倭欲與合夥迨越台州始知舊倭已破於是旣
畏譚兵不敢南復畏土兵不敢北卒至於敗如公所

料云

武進舉人吳欽撰

仙居之捷

嘉靖三十五年

嘉靖丙辰春三月 朝廷以都御史胡宗憲累建奇
勲命以兵部侍郎總督浙直福建軍務會福建桐山
之賊流逼浙境同知黃釗指揮梅魁禦之賊潰圍北

走公密令副使劉懋預伏兵塔石蕉蒲諸山舉險阨則潛置火器以待仍列舟師於山側之江濱賊至伏起殺傷甚衆遁由天門埭至平陽青田越小峙沿江而南遂入荆溪荆溪通仙居樂清之孔道也時臨海天台業已受公計集鄉兵守黃潭箬孔中渡由是賊不得犯寧紹由烏杭西入仙居乘城築未完衝突焚劫慘倍他地乃咨提督都御史阮公鶚馳救之復行副使許東望知府譚綸總兵盧鏜兵從東路而進賊聞大兵且至遂走斷橋彭溪巢於民舍我兵合圍攻之俘斬三百餘級焚溺死者無筭所存六十餘人取

道天台之北復爲赤城民兵所殺是時浙東西硤石梁湖之賊各萬餘人俱薄會城魁桀難制江南北新舊屯據者數亦逾萬公以一身寄諸藩之安危以一心當百萬之兵甲隨機督勦筭無遺策直隸有寶山之捷兩浙有西庵清水窪之捷而桐山流寇亦旋就殄戮謂公今之子儀非耶

嘉善訓導謝顧撰

乍浦之捷

嘉靖三十五年七月

嘉靖丙辰秋七月賊徐海陳東之解桐鄉圍而東也陽爲聽撫心實狐疑自呂港新場移屯乍浦城南營廠絡繹改修舊船以啗出海且窺伺我兵強弱爲其

進止總督侍郎胡宗憲策知其計因外示羈縻而密檄副使劉燾啗之會尚書趙公文華再命督察至公乃與定議以乍浦西南海塘可通杭州咨浙福提督都御史阮公鶚偕郎中郭仁副使徐洛總兵徐珏等壁海鹽以遏犯杭之路東北金山可通松江浦東咨直隸提督都御史張公景賢駐松江而叅政任環僉事董邦政留守王倫同知熊桴容美土官田九霄等扼青村黃浦及出海之路公親督大兵與叅政汪栢叅議王詢等駐平湖與賊偪壘而陣總兵俞大猷盧鏜等則以舟師設伏洋山馬蹟邀其歸路分布旣

定候間而發適上海之賊由吳淞而西南出復萬餘人公恐海或中變與之連衡急啗海使東出擊賊可得舟還島海以爲然果逆斬賊數百賊遂夜走以故海不及取其舟而返其他酋長脫出海者公已別遣大猷伏飛艦海上遮擊之溺且盡公又計海書記麻葉不死無以堅其內附之心而陳東者與麻葉聲相倚桐鄉之設與海相睚眦者也於是又計令海縛麻葉併陳東以獻海遂併有其衆而諸酋長則疑且怨海矣海自度進退無所而公故與趙公薄責海益急因遣謀私海令其誘衆俘斬之以謝可無罪海不得

已從之遂與定約

與前縛麻葉陳東等俱詳見鹿公門茅氏所爲剿徐海本未紀

乃令副使劉燾引遊擊尹秉衡兵夜伏乍浦城中而徐珏等兵分爲三哨進壁白馬廟左灝等兵由平湖間道而出主簿曹廷慧叅將丁僅等壁乍浦城以爲內援至期珏等移營瓦山海果挈妻走海上艘羣倭爭逐之大亂城上舉火我兵四合兢進大敗之燒賊巢廠二十餘里時海執稱歸順投梁庄去諸遁出海洋者大猷兵邀擊之前後俘斬七百有奇沒海及焚死者無筭乍浦之賊無孑遺矣夫徐海以首惡煽禍而陳東麻葉等爲之犄角勾引外夷侵擾中土受其

螫毒者五年矣丙辰春擁衆數萬分道入寇北犯瓜揚阻絕運道東掠寧紹牽制我師聲言欲下杭州犯留都比之曩時猖獗尤甚公相度機宜不輕與爭鋒捐千金賞敢死之士用間誘退呂港賊艘以伐其深犯之謀復誘令殺賊立功以剪其羽翼之勢擒麻葉擒陳東度其孤危可以取矣猶謂困獸死鬪乃故弃船海澁開一面之缺而卒以遊兵邀之無一得脫者後先下着不爽纖微島夷之所以畏服而東南之所以奠安者不以此哉不以此哉

餘姚舉人諸大圭撰

勦徐海

嘉靖丙辰徐海之擁諸倭奴而寇也一枝由海門入略維揚東控京口一枝由淞江入略上海一枝由定海關入略慈谿等縣衆各數千人而海自擁部下萬餘人直逼乍浦而登岍則破諸舟悉焚之令人人各爲死戰又導故窟柘林者陳東所部數千人與俱併兵攻乍浦城蓋四月十九日也當是時朝廷方奪故總督而新總督胡公自提督代之甫八日問幕府麾下募卒僅三千人俱孱弱不可用故總督所徵四川湖廣山東河南諸兵俱罷去所爲緩急者特容美土兵千人及叅將宗禮所

藉河朔之兵八百人耳南北諸倭酋不下數萬謀者聲言他酋分掠於江淮吳越諸州郡間以扼援兵而海等當窟乍浦下杭州席卷蘇湖以脅金陵氣恣甚總督胡公方召諸司畫計無何故提學阮公代胡公爲提督檄未至夜半聞乍浦圍卷甲趨之胡公亦分遣兵澈浦海鹽之間爲聲援而自引兵壁塘栖相犄角居頃之海聞新總督胡公卽故御史所嘗提兵督戰於鶯湖王涇之間而覆之者氣稍阻尋罷乍浦圍聞兩公方擁兵壁近郊不復敢窺杭於是徑略峽石越皂林出烏鎮以北烏鎮

海防集要 卷之十 十四
者卽海故所犯蘇湖舊路也當是時胡公旣獲謀
度蘇湖之間惟鶯湖爲四戰之地於是檄河朔兵
自嘉興入駐勝墩陣而待因以吳江水兵遮其前
湖州水兵尾其後而公自引麾下募卒及容美土
兵衝擊之提督阮公自崇德聞賊且出烏鎮也卽
道挾河朔之兵騎而馳及之於皂林令善射者且
躡且射賊稍稍引去賊縱數百人嘗之輒又敗去
賊怒甚鼓噪而前提督阮公勢皇急於是走輕舸
入保桐鄉而叅將宗禮與將霍貫道等乃自張
左右翼厚集其陣以待戰數合擊殺數十人會日

暮賊且引去時賊氣頗窘而宗禮霍貫道等亦已
絕嚮導不得擇善地便水草以自休止明日俄而
戰賊遣候者樹而望蓋孤壘以塹無他援者也大
喜復縱兵以半擊其前以半繞其背而霍貫道河
朔故驍將也大呼衆力戰矢砲如雨下無不人人
一當十復擊殺數十百人而貫道亦手自刃十餘
人賊益怖海且中砲欲馳去會火藥盡霍貫道面
宗禮仰天呼曰吾兩人再得藥數斗可以了此賊
矣未幾貫道與宗禮俱陷衆大敗賊遂乘勝圍桐
鄉時總督胡公已引兵躡崇德聞之潛然流涕曰

河朔之兵旣敗東南之事無復可支矣賊已困桐鄉假令復分兵困崇德以劫我我兩人譬之抱石而自沉也 國家且奈何於是還省城檄諸路兵爲戰守計先是公始爲提督時嘗與監督尚書趙公謀曰 國家困海上之寇數年於茲矣諸倭奴乘潮出沒將士所不得斥堠而成者人言王直以威信雄海上無他罪狀苟得誘而使之或可陰携其黨也按部題亦嘗有用間爲策者於是遣辯士蔣洲陳可願及故嘗與王直友善者數輩入海諭直直果感悅願如約遣其養子毛海峰款定海關

謝過間以諭海海已勾薩摩諸島人入劫故不相及而海峰者云云彼固未之聞也胡公策曰直與海雖順逆不同其勢固唇齒也直旣悔悟海獨不可以大義說之乎不然彼貪人也誘之以利或可徃其心聞桐鄉城小而堅緩之數十日則永保戍兵至固可破之矣於是疾走人諭海峰因厚遺謀者陰過海所曰直已遣子款定海關 朝廷固且赦之矣若獨無意乎新總督威名非曩時比且仰體 朝廷德意推心置人腹若不乘此時解甲自謝他日必爲虜矣海頗然其計於是亦遣曾自謝

約罷圍去因以要公稍出中國貨物遺他倭酋而
疏釋其罪公佯諾輒以銀牌綺幣厚遺來謝酋而
陰令營中盛兵容私謀者故縱酋瞰之酋旣德公
遣又內怖公之兵威也歸以報海明日復遣他酋
來謝公視之如初凡數復海於是始歸心於公願
爲公死之矣然陳東獨心切疑海私公遺猶鞅鞅
未之從也海間遣酋次桐鄉城下私城上兵曰某
已聽總督胡公約解去矣城東門故柘林賊陳東
黨也鴛悍不吾從若當謹備之是夕海果道崇德
而西且乞他兵於公以夾擊東胡公猶心訝未之

許而東獨盛爲樓櫓撞竿以撞城而桐鄉令金燕
者疆幹吏也城中一切兵仗火藥諸已繕備提督
阮公復躬厲矢石徇城上人下令散千金募敢死
之士督戰益亟所殺傷賊亦數十人方撞竿自樓
櫓中躍而撞城城幾壞一男子爲縉索圍撞竿所
擊故窟處竿至卽縉挽以上斬之又募治者煮鐵
汁灌城下酋城下酋不敢逼東旣無何聞海等解
去道遠勢且孤亦相與稍稍引去圍始解而提督
阮公出矣時五月二十三日也方阮公困桐鄉時
固日夜望總督胡公援兵之至而胡公亦重念東

海防集要 卷之九
南之安危身之禍福與阮公相旦暮情固急業已遣兵備劉公督同留守王倫宣撫田九霄勒兵自嘉興入壁斗門分守汪公督同知縣張冕勒兵自湖州入壁烏鎮叅將丁僅勒兵自海鹽入壁王店指揮樂墳督同千戶羅天與勒兵自崇德入壁石門又令崇德令崔近思收河朔之散卒入城爲聲援兵四面環賊遠者二三十里近者十餘里而陣然各以狃皂林之敗逡巡惶怖不敢逼而公業遣謀羈說賊亦日夜望永保戍兵之至以決一戰也計無可奈何而胡公與阮公兩人者爲同年故深

相結者及援兵不合阮公自圍中頗急於是兩相猜而他謗者與爲飛語撼兩公者盈道路矣當是時 朝廷聞東南之寇卽日出尚書趙公督山東河朔諸兵援之又兩公所私相猜者語頗聞趙公趙公亦故與兩公者爲肺腑交所嘗兩推轂中朝以鎮東南者念兩公卒有郟則東南之事牴牾不可圖於是日夜引兵而南至揚州則阮公業已出桐鄉圍東渡錢塘狗會稽諸下邑擊他賊胡公亦聞尚書趙公之至且戰且南淮揚昆陵之間無足慮海爲巨孽間雖狃而內附中固不可測而上海

海防集要 卷之九 十一
之賊萬餘人由吳淞江西引方急迺日遣謀者啗
海以金帛而說之東出海上擊他賊海亦果收諸
倭酋出乍浦道平湖時謀報吳淞江之賊已鼓行
涉嘉善界欲西合海公念海萬一卒他變兩相合
奈何因策海始已焚舟爲深入今不得舟必急於
是遣謀訶海謂海旣內附何不如故約勒兵擊吳
淞江賊且篡奪其輜掠舟以歸海果然其計卽日
引諸酋逆之朱涇道上斬首若干級餘賊遂夜走
以故海不及篡奪其舟而還及他酋脫而出海也
公又別遣總兵俞大猷伏飛艦海上遮擊之溺且

盡於是海旣德公不敢背又聞吳淞江賊之出爲
海兵所遮擊益內怖日輸款於公遂輦故所戴飛
魚冠及他堅甲名劍數十種竝以輸公而間遣其
弟洪入質於公公固佯納之公又謀聞海麾下獨
書記葉麻爲長酋其爲人頗黠而悍近與海爭一
女子有微郤非用間急縛之則無以死彼之內附
之心於是遣謀就海帳中諷海縛葉麻以出葉麻
出而諸酋中故隸葉麻部曲者稍稍怨且懼矣怨
且懼恐生他釁則又以他罪縛得幾百餘人公又
策陳東於諸部曲中與葉麻聲相倚頃以桐鄉之

海防集要 卷之九 九
役兩睚眦者也數遣謀持簪珥璣翠遺海兩侍女
令兩侍女日夜說海并縛東海間諾而陳東者薩
摩王弟故帳下書記酋海固未之能也於是出葉
麻囚中令其詐爲書記於東反兵賊殺海其書故不
以遺東陰泄之於海激怒之使并縛東海讀其書
涕雙下益德公之不忍爲東所賊殺之也日夜謀
縛東以報公居無何尚書趙公移兵渡江來所過
州縣數舉兵向賊賊輒敗走俘斬若干級兵威大
布當是時公已知海之甘心於東不忍疾擊海疾
擊之兩人迫而深相結則東南之事未易圖而尚

書趙公之至也私約公共部署兵擊海日急且召
公故所遣謀面詰之曰若爲我諭海海連兵以來
罪不容死非縛陳東及斬千餘級以獻恐無以謝
朝廷若能則吾當同督府諸公疏釋之不然若且
虀粉矣是時阮公亦至於是海益怖出所故掠中
國貨物千餘金賂王弟詐請東代署書記海因夜
得東卽縛以故約復於胡公葉麻與陳東相繼縛
而諸酋長洶洶內亂矣是時諸酋長旣疑且怨海
無鬪心故其氣日窘海亦自度縱令反故島當亦
必爲諸酋長所賊殺故爲內附日固而公與趙公

海防集要 卷之九 十一
薄責海益急海旣急因念欲掠舟出海恐爲海上
兵所劫欲列壘拒官兵又業已內附不忍背且陳
東黨固日夜襲殺之也公策曰彼旣亂吾可乘之
矣因遣謀私海曰我固欲寬若趙尚書翁以若罪
孽大何不聽我艤數十艘海上若且誘之逐海上
艘令俘斬千餘級以謝趙公而若因得以自完乎
海不得已且疑且諾因約兵備副使劉公引兵伏
乍浦城中而某日時某當引衆出海旣去乍浦城
半里而陣佯令衆會逐海上艘某手旗麾之城
中官兵卽舉燧爲號從城中出亟擊勿失諸官兵卒

如故約乘之諸倭會逐海上艘如蟻不及還兵鬪
於是諸官兵得乘勝蹂而前不傷一卒所俘斬數
十百人沒海者無筭於是海自以數有功於朝
廷願與部下諸酋長入款且庭謁胡公與尚書趙
公提督阮公及巡按趙公竝許之謀徃復期以八
月初二日然海猶恐間設甲士劫之先期一日卒
擁酋數百人胄而陣平湖城外自帥酋長百餘人
胄而入平湖城中以求四公者計不許恐他變遂
許海與諸酋長北嚮面四公按次稽首呼天星翁
死罪死罪海欲再爲款胡公而未之識因顧謀謀

日示之海復面胡公稽首呼天星爺死罪死罪胡公亦下堂手摩海頂謂之曰若苦東南久矣今旣內附朝廷且赦若慎勿再爲孽海復稽首呼天星爺死罪死罪於是四公厚犒遺之而出是日城中人無不洒然色變者海旣出諸公者固已忿恚海之列款猶胄而入屬彊脅無禮又不及如謀故所期月日而先日卒至也其習行桀黠若此於是闔謀不勒兵誅之他日必爲患計部下尚千餘人猛鷲難卽破永保兵猶迤邐遠道未至也於是佯令海自擇便地居之海果自擇便地得沈家庄卽

做沈家庄與居之是爲八月八日當是時衆復喧然譁諸公輩何不撲滅海不然且縱之出海上令自解去顧豢虎以自禍也不知諸公者固有待於是胡公與尚書趙公提督阮公私自部署兵又日夜遣使趣永保兵來會兵未集恐海驚禍且肘腋間胡公因日遣諜訶海且啗海如曩時公因謀以請於趙公曰吾聞善兵者乖其所之海與陳東黨業已深仇今合而兩附者迫故耳聞沈家庄故東西兩處而中綰河爲塹何不說海以西沈家庄居陳東黨而自擇東沈家庄以居部下曾乎諜以諭

海海果如其言頃之永保兵至會海輸二百金於
公市酒米公復與趙公謀以藥毒其中而歸之又
令陳東詐爲書夜遺其黨曰海已約官兵夾剿汝
輩矣陳東黨果疑而夜伏邏卒東沈家庄道上瞰
之適海皇急因令會竊兩侍女出道上而急則因
間道走幕府以自托邏卒瞰知之歸以報於陳東
黨陳東黨聞之大驚卽勒兵篡兩侍女過海所罵
曰吾死若俱死耳遂私相稍而鬪海中稍衆大亂
明日官兵四面合墻立而進保靖兵先當之稍却
河朔兵乘之又却俄而胡公擐甲厲聲叱永保兵

左右列大呼而入瞰壘下擊會風烈公麾衆束千
餘炬人各持炬縱火焚之海窘甚遂沉河死甫食
頃人人驚而攫千餘會蒐斬殆盡矣中所故飲毒
首虜黑色者凡三百餘人於是永保兵俘兩侍女
而前問海何在兩侍女者王姓一名翠翹一名綠
姝故歌伎也兩侍女泣而指海所自沉河處永保
兵遂蹈河斬海級以歸

副史茅坤撰

龕山之捷

嘉靖三十五年十一月

龕山之賊自溫州登岼蔓延於會稽經歷文某與戰
于苦竹嶺副使孫宏軾併軍門所調奇兵與戰于析

海防集要 卷之九 二十三
開嶺于翁家村叅將盧鏜與戰于斤嶺于梁術賊少
却走龔家畷百官渡過曹娥江順流而西狡黠善鬪
噬齧孔棘初總督都御史胡宗憲方在浙西勦川沙
之賊移檄諸將竟未有能殄之者至是親提大兵至
欲斬不用命者以殉於是僉事李如桂王詢指揮楊
永昌知事何常明典史吳成器等兵併力追擊於瓜
山戰三界戰母婆嶺朱家漫賊遁蕭山之丁村杭湖
至陳家灣雖多所殺傷而凶燄愈熾公至擇地形壁
龕山之巔分諸將信地皆露宿以待時叅將盧鏜戰
還公促明日再戰鏜曰士疲矣休養數日乃可公佯

許諾而密召親兵謂曰若曹叅養乂未立戰功今賊
行滅而諸將首鼠不進萬一賊得脫此徑渡錢塘江
奈何今日正若曹立功之會能乘其不意而襲之賊
可盡也衆皆踴躍請効死已乃激令成器統之以進
不數里遇賊死戰無不一當十賊遂大敗循海而走
登匿山坡堡內我兵四面奮擊不得已登屋擲瓦礫
下瓦盡繼之以槍槍盡投刀刀盡乃下死守我兵攻
堡破之悉斬首以獻時日且暝公喜謂諸將曰此賊
流突千里轉戰無慮數十無能撓其鋒者今一鼓蕩
平真 朝廷天威也命取賊心啖之選猗猗首級廿

餘顆置案上每顆爲飲一觥左右皆失色而公談笑自若也達旦諸營方知破賊相率入賀公謂鏜曰再一二日何如鏜大慙服乃完師而歸時乙卯冬仲旣望也

山陰縣學生員徐渭撰

金塘之捷

嘉靖三十五年

辛五郎者宿寇徐海之偏裨也與陳東葉宗滿葉麻輩同巢柘林攻乍浦圍桐鄉毒螫吳下諸郡其志欲吞全浙窺留都勢甚猛也總督胡公欲滅之忌海與其黨旣而海受餌爲我用擒其所惡陳東葉麻輩而遣其所懼以歸倭島五郎在焉公密令總兵俞大猷

等分布海洋要衝截殺諸寇而五郎則責之盧鏜鏜接密諭時方對諸客食忽命治艦之金塘山客相顧莫知所謂鏜自乘福船令將官率哨船若干以行次日至金塘瞭見比洋有大舟揚帆而南令哨船四散潛泊少選大船艤金塘之麓賊皆登憩鏜知其爲五郎也令哨船叢射之繼以銃炮賊以手且搖且招搖者示勿攻擊招者示有所言也哨兵颺言曰欲打話須去爾兵器則拍掌示無而呼一董

一董者一家之義乃倭誘也

有華人從寇者曰吾乃胡總督爺招安放回者也哨兵曰有牌驗乎曰有鏜招衆賊至舟傍慰籍之謂五

郎曰汝既爲軍門所遣豈可慢乎請至縣款洽而津送之遂延五郎同舟餘派哨船分載每載不過三四人多則不能容也五郎辭鏜厚加體貌五郎不疑宴至深夜鏜坐福船上層將臺侍者引雙燈上桅俄而哨船喟聚鏜問之曰如何齊應曰是了五郎大驚請下哨船與衆夷同宿鏜曰諾令左右送之穴梯而下至蓬戶外望維海不見五郎悟欲赴水死左右不許曰卧塌在地平下五郎度不能免浩歎就卧遂縛之翌日入定海關乃知賊徒俱已芟盡卽前夜起雙燈時也是了者乃復命也羣賊死時皆不知軍門之謀

僉訝哨兵敢行悞殺五郎亦自以偶遇盧鏜被執不知其出軍門也嗚呼神哉後獻俘告廟天子賜璽書獎公天下無不稱快哉

崑山進士王宇撰

擒王直

王直者歙人也少落魄有任俠氣及壯多智略善施與以故人宗信之一時惡少若葉宗滿徐惟學謝和方廷助等皆樂與之遊聞嘗相與謀曰中國法度森嚴動輒觸禁孰與海外乎逍遙哉直因問其母汪姬曰生兒時有異兆否汪姬曰生汝之夕夢大星入懷傍有峩冠者詫曰此弧矢星也已而

大雪草木皆冰直獨心喜曰天星入懷非凡胎草木冰者兵象也天將命我以武勝乎于是遂起邪謀嘉靖十九年時海禁尚弛直與葉宗滿等之廣東造巨艦將帶硝黃絲綿等違禁物抵日本暹羅西洋等國往來互市者五六年致富不貲夷人大信服之稱爲五峰船主則又招聚亡命若徐海陳東葉明等爲之將領傾貲勾引倭奴門多郎次郎四助四郎等爲之部落又有從子王汝賢義子王激爲之腹心會五島夷爲亂直有宿憾于夷欲藉手以報及以威懾諸夷乃請于海防將官而剿之

無孑遺者而聲言宣力 本朝以要重賞將官餽米百石直以爲薄大詬投之海中從此怨中國頻入內地侵盜直又嘗以扁舟泊列表叅將俞大猷驅舟師數千圍之直以火箭突圍去怨中國益深且眇官軍易與也乃更造巨艦聯舫方一百二十步容二千人木爲城爲樓櫓四門其上可馳馬往來據居薩摩洲之松浦津僭號曰京自稱曰徽王部署官屬咸有名號控制要害而三十六島之夷皆其指使時時遣夷漢兵十餘道流劫濱海郡縣延袤數千里咸遭荼毒而福清黃巖昌國臨山崇

德桐鄉諸城皆爲攻墮焚燔廬舍擄掠女子財帛以鉅萬計吏民死鋒鏑填溝壑者亦且數十萬計比年如是官軍莫敢嬰其鋒但爲計狡譎每殘破處必詭云某島夷所爲也故東南雖知王直之叛而不知受禍之慘皆由直者獨總督胡公前按浙時見賊進退縱橫皆按兵法知必有坐遣者且賊曾來者皆直部落也而不聞直來其爲坐遣無疑先是間使徽州收其母妻及子于金華府獄中至是出之豐衣食潔第宅奉之以爲餌而疏請以移諭日本禁戢部夷爲名其實注意伺察直也 上

從之乃遣生員蔣洲陳可願充正副使以行公以密計授洲等曰王直越在海外難與角勝于舟楫之間要須誘而出之使虎失負嵎之勢乃可成擒耳又曰王直南面稱孤身不履戰陣而時遣偏裨雜種侵軼我邊圉是直常操其逸而以勞疲中國也要須宣布 皇靈以携其黨使窮髮皆知向化則賊之勢自不能容然後道之滅賊立功以保親屬此上策也洲等領計敬諾而行居無何倭酋董二被擒訊道直事甚悉與公所料不爽毫髮中外始曉然知狀于是 上以公灼見禍本降 璽書

海防集要 卷之九
三十八
褒勞而聞外之事一以委公公得 旨規羅益密
御史金淵陶承學交章請立賞格有能主設奇謀
生擒王直者封伯予萬金部議從之 詔曰可嘉
靖三十四年十一月洲等至五島遇王激道以移
諭事激曰無爲見國王也此間有徽王者島夷所
宗令渠傳諭足矣見國王無益也明日直出客館
見洲等椎髻左衽旌旗服色擬王者左右簇擁洲
等心動坐論鄉曲設酒食相對情款方洽洲等曰
總督公遣洲等敬勞足下風波無恙直避席曰直
海介逋臣總督公不曳尺纏牽而鞫之而遠勞訊

使死罪死罪洲等曰總督公言足下稱雄海曲志
亦偉矣而公爲盜賊之行何也直曰總督公之聽
誤矣直爲 國家驅盜非爲盜者也洲等曰是何
言與足下招聚亡命糾合倭夷殺人剽貨坐分鹵
獲而爲之辭曰我非爲盜者是何異于昏夜操畧
以臨人之池執之則曰我非盜魚者爲君護魚者
也雖三尺童子知其必不然矣直語塞洲等曰總
督公統領官軍十萬益以鎮溪麻寮大刺土兵數
萬艤幢雲屯戈矛雨注水陸戒嚴號令齊一而欲
以區區小島與之抗衡是何異于騁螳臂以堂車

轍也又曰總督公推心置腹任人不疑拔足下壽
母令妻于獄中館穀甚厚則公之心事可知矣何
不乘機立功以自贖保全妻孥此轉禍爲福之上
策也直默然而罷乃挾洲等巡數小島而還而從
此風聞外夷隨其願指者頗少變而叛賈倚直爲
淵藪者多有離心直始不安于彼矣初直聞母妻
爲戮心甚忿欲犯金華及聞洲等言無恙又竊喜
于是始有渡海之謀日夜集所親信者計之謝和
等曰今日之舉未可冒昧以往也當遣我至親爲
彼所素信者先往宣力以堅其心待彼不疑然後

全師繼進始可以逞直笑曰妙筭也遂托宣諭別
國爲名留蔣洲在島令葉宗滿王汝賢王激同陳
可願回至寧波詰之皆云宣諭未至時徐海陳東
已擁薩摩洲夷過洋人寇矣今王直歸順先遣葉
宗滿等投赴效力成功之後他無所望惟願進
貢開市而已公得報已揣知其計姑從所請疏
上許之公喜曰虜在掌中矣先是海中倭寇敗沒
有零寇百餘據舟山爲亂公遣葉宗滿等協助官
軍剿之盡殲焉公疏上功次犒賞有差王激笑
曰此何足賞若吾父至當取金印如斗大嘉靖三

十五年三月徐海等果擁衆十餘萬寇松江嘉興諸郡甚急聲言欲下杭城取金陵勢張甚公乃謀之王激等以觀其意激等初欲小試慙慙故甘心于舟山之寇至于徐海等正其所倚以圖大事者且欲速直來共濟乃辭曰是非吾所能辨須吾父來乃可耳遂留夏正童華邵岳輔王汝賢在軍門自以招直爲名與葉宗滿開洋去是年徐海等以次就擒事見徐海傳公恐形跡彰露委心留用王汝賢等撫摩若親子然葉宗滿兄弟竝加禮遇時時對將吏士民曰直非反賊顧咄強不一見我見

我當有處也直聞公意指謂公誠朴可欺欲乘機以全親屬且未知徐海等敗沒以爲縱不如所料亦可與之應援得志而去遂決策渡海先遣蔣洲次遣王激葉宗滿等率銳卒千餘執無印表文詐稱豐洲王入貢先泊岑港據形勝分布已定直乃與謝和慷慨登舟醜酒誓衆曰俞大猷吾嘗破之列表泊岍時須謹備之公當直未至時已度其有隙調俞大猷于金山而以總兵盧鏜代之盧鏜者舊與王激等從事舟山同飲食撫循倭夷備至直坦然不疑惟日聚羣倭礪兵亦伐竹木爲開

市計且索母妻子弟求官封時公計已定仍姑列
狀上請以安其心上巳知直爲釜魚智力俱
非胡公敵乃顯詔王直旣稱投順却挾倭同來
以市買爲詞胡宗憲可相機設謀擒剿不許踈虞
致墮賊計公奉詔秘而不宣夜馳至寧波城圖
方略密調叅將戚繼光張四維等督諸健將埋伏
數匝水陸要害星羅棊列魚鳥莫度乃以夏正等
爲死間諭直曰汝欲保全家屬開市求官可以不
降而得之乎帶甲陳兵而稱降又誰信汝汝有大
兵于此卽往見軍門敢留汝邪况死生有命當死

戰亦死降亦死等死耳死戰不若死降降且萬有
一生焉直拂然不悅而公與其所親信王澈葉宗
滿先遣來見者連床卧因佯露諸將請戰書十餘
篇于几案王澈等竊視驚怖夜半公作醉夢中語
云吾欲活汝故禁不進兵汝不來休怨我也含糊
其辭吐滿床王澈等漏之于直直始疑之又使其
子澄嚙指血寓直書云軍門數年恩養我輩惟願
汝一見使軍門有辭于朝廷卽許眷屬相聚汝
來軍門決不留汝藉令不來能保必勝乎空害一
家人耳又使邵岳童華等往來游說直猶豫未決

海防纂要 卷之六
公以直執戀岑港已踰五旬察其心神終屬觀望
乃開關揚帆示欲進兵直探知四面兵威甚盛終
無脫計且知徐海等敗沒孤立無援因嘆曰昔漢
高祖見項羽鴻門當王者不死縱胡公誘我其奈
我何乃曰部兵無統欲得王激攝之公知海上諸
賊惟直多智習兵久雄異域得人心爲難制其餘
皆鼠子輩毋足慮諸將亦云以犬易虎不可失也
遂遣激徃直乃桀然詣軍門時嘉靖三十六年十
一月也公執之付按察司獄乃集三司諸大夫叅
議曰王直始以射利之心違明禁而下海繼忘中

華之義入番國以爲奸勾引倭夷比年攻劫海宇
震動東南繹騷雖稱悔過以來歸仍欲挾倭而求
市上有干乎 國禁下貽毒于生靈惡貫滔天神

人共怒問擬斬罪猶有餘辜公具疏 上請得

旨斬直于市梟示海濱妻子給功臣之家爲奴王
汝賢葉宗滿俱從末減邊遠充軍王激出洋爲颶
風所覆其餘從賊魚散鳥驚奔聚山谷公親督官
兵掃除黨與皆絕嘉靖三十九年二月兵部始以
封賞之議 上請 詔曰大憝旣除海氛已靖部
議報謝徐徐何也胡宗憲可太子太保都察院左

都御史兼兵部左侍郎蔭一子錦衣衛副千戶其餘有功者陞賞有差

舟山之捷

嘉靖三十七年二月

嘉靖戊午春二月總督侍郎胡宗憲擒獲元兇王直其餘黨泊舟山之岑港倚險列柵勢甚猖獗公命把總任錦指揮甘述宗等進泊江口之南都指揮李涇指揮張天杰等泊港口之北總兵俞大猷等以福船并叭喇烏八槳串網船往來策應指揮周官土官彭志顯領大刺土兵由中路小河嶺入指揮楊伯喬唐鏊土官張領鎮溪麻寮兵由右路碇礮入叅將戚

繼光率部兵由左路小嶺入而指揮楊永昌盧錡鮑尚瑾方昇通判吳成器等分道策應叅政王詢劉燾副使陳元珂則監督之約期水陸竝進直抵賊巢時都指揮戴冲霄先用火攻殺傷頗多公許全捷俱淮首功禁取級以妨前進我兵蹂屍而戰賊大敗奔舟忽港側砲聲大震復擁衆登陸抄後死戰我兵後哨稍却前鋒四擊橫衝賊乃斂營固守公以夷僧德陽稱貢而來賊脅爲聲援可計而離也乃潛縱之令成器遣諜持信票數百入巢散其脅從由是賊勢日孤爲守益堅公又檄諸將曰賊所以負固死鬪者蓋春

汛已及計有新倭可爲應援若哨擊稍踈必流突與合矣此非小利害也其督舟師預爲哨探之計無何果有倭船泊普陀小道頭叅將張四維推官查光述等督兵且戰且逐至烏沙門外洋賊遂潰敗俘斬四十餘級賊走登烏沙懸山卽朱家尖山也公策此賊與岑港之寇相距不遠陸路必由碇礮水路必由嚮礁門乃檄諸將設伏以待已而賊果由二處奔沈家門與岑港合踪公不得已親蒞定海分遣將領各與信地福船由岑港南口廣船由北口宣撫田世爵都指揮何本源等兵由馬畧至張礮一由 寺嶺至

三官堂一由小嶺至聚水塘進而以元珂四維往來監督又遣奇兵由天童逕搗賊船仍近巢半里許列一老營以燾居中調度叅政胡堯臣防守所城督發糧餉尅期大舉時賊依山阻水列柵自衛火器頗多我兵陷陣先登者間多被害公復檄諸將從中逼壘而陣且示以哨伏應援之規更番迭戰以耗其火藥折其銳氣又令夷僧輩招之私語賊遂互相猜疑至持刀自擊我兵乘隙進攻賊衆大亂夜分縱火焚其舟死者無筭餘各奔巢我各躡之斬柵而入斬馘百餘級復奔柯梅嶺我兵追之火其巢廠賊勢窘甚遁

出浦口四維與指揮朱尚禮等舟師追至俞山外洋見賊連艘而行遂以兵船潛伏山下而以小艇嘗之賊果逐利來追伏兵大起夾擊之犁沉四舟擒其渠魁汪印山陳禮等斬首九十餘級溺死者不計王直之黨至是盡矣是捷也五哨之布公有成筭而大猷等參錯不進沈家門合踪公料敵如神而諸將不先事追擊至厓定海之設非公淵度圓機小挫不折能因敗爲勝且奈何哉嗚呼於是見公之心獨苦矣俞獻可撰

淮揚之捷

江北之有倭患自嘉靖乙卯始淮揚故多大賈富戶賊至屬厭以去自是歲以爲常丁巳夏賊千餘深入天長泗州祖宗陵寢幾至震驚廷議特設提督都御史而以豐城李公遂至卽立什伍之法定援應之規練鄉兵嚴保甲設將官築城垣造戰艦爲水陸戰守之計賊知有備船泊握港者不敢登岸而去江北賴以無事已未賊萬衆連艘分道竝入中外震恐時四月一日也公閱兵通州計賊若從海門西亭趨如臯則通州在賊外乃兼程趨通秦州而以副使劉景韶遊擊丘陞駐兵如臯以扼要害檄各路兵進黃

海內集要 卷之九
橋海安等處援應已而賊至益多我兵迎戰挫其前
鋒賊果出西亭知如臯有備遂由通州東趨白浦鎮
公計賊深入利在速戰戒海防等兵據丁堰東北堅
持不出時東南風急我兵不便迎擊公籲天以祭風
卽回連三日乃擐甲誓師斬不用命者人皆踊躍以
進又計賊過如臯必由黃橋泰興犯瓜儀則糧運阻
梗留都搖動若驅之富安以北沿海東出無能爲矣
乃身當泰州之衝而以黃橋西路責景韶等賊求戰
不得進據丁堰丘陞從河北縱火焚之邊兵衝入賊
營毛葫蘆兵復從南出首尾夾擊賊退屯二十里連

日接戰斬其金盃賊首一人日且晡我兵少卻賊進
至如臯公計其必奔揚儀趣與海防遊擊兵從間道
越過賊前徑趨泰州若以爲西路之防其實於泰州
待敵也執賊軍潛入城爲內應者賊未至三十里輒
從富安沿海東出我兵追躡賊後公戒毋輕戰晝則
逼令不得久駐夜則退屯以防衝突公親提大衆馳
淮安馬邏之間約與諸將夾擊於廟灣賊覘知之分
其衆一由西亭一由白蒲丁堰以牽制我師公令景
韶陞專擊二賊而身赴淮安以當大敵丁堰流賊至
曹家堡與我兵遇逐北至潘庄全夥覆沒公至淮安

而總督侍郎胡公與視軍通政唐公順之亦提青沂兵至相與合勢公乃部分中軍馬兵爲前驅曹克新兵爲中哨青州邢鎮兵爲左哨沂州何本源兵爲右哨中軍倪祿梅三錫合曹沂徐邳等兵爲後繼列陣於姚家蕩以待初賊計我兵綴於丁堰之賊急走淮安欲掩其無備比至見兵勢甚盛相顧驚愕盡銳衝我左哨公揮兵四面圍擊俘斬八百有奇焚溺死者不計賊不得已奔守廟灣于時西亭之賊夜走海安諸將不能禦公以廟灣賊垂盡恐揚儀有失乃親往揚州而視師唐公援兵亦至時賊已奔張庄因益兵

赴援海安而與唐公俱還廟灣督諸將搗巢令軍中多具畚鍤先填溝港毀民舍之傍賊巢者我兵分番進攻斬級一百五十有奇賊乘風雨夜遁而西亭亦以全捷來告無何閩中之賊止近百然沿海轉掠來去無定踪不可力取爲颶風飄至者公令守備楊縉擊滅之斬其酋長八大王孟得山崇明三沙之寇潰圍而來時海門狼山如臯泰州揚州俱潛有備賊由七星港焚舟登岍深入枿茶場楊縉陳忠等兵尾擊之自是連戰皆捷斬級三百有奇賊乃竟走海塗而公已宿戒沿海無得泊舟以是賊不得去復敗之劉

海內集要 卷之九
三十一
庄會唐公遣副總兵劉顯道至公益以親兵使與賊戰賊連敗走竹堰仍沿海北遁我兵追及之於七竈斬級九十有四又及之茅花墩斬級一百七十賊奔唐家滌僻遠無兵復登岸掠食而公故所練鄉兵追兵競逐之斬級一百四十有奇賊遂盡絕矣是役也自夏及秋僅四閱月前後斬戮焚獲不可勝紀其成功之備何如耶予嘗宦遼陽聞永樂間都督劉公江鎮遼時有倭患望海埚之戰斬級千餘生擒四百封廣寧伯至今海上之烈人猶頌之公以文臣特起其所建立卓卓如此真足以宣揚 朝廷之威發舒

夏之氣匪直淮揚之利而已夫賊之始至也非公決戰通泰則瓜儀維揚必受荼毒而運餉不免焚掠賊之東奔也非公出賊不意收功姚蕩則淮城多不可守而鳳泗不免震驚三沙之賊北渡也非公預有成筭厲兵急戰則以彼勝勢乘我困疲又適我地災饑幸亂樂禍之人內應必衆事變未可測也記曰以勞定國則祀之能禦大災則祀之能捍大患則祀之公於三者實兼有焉予不文聊述其所見之略

兵部侍

郎蔣應奎撰文節略

已上籌海圖編

海防纂要卷之十

黎陽王在晉明初甫纂

男會苾穉勸甫較閱

紀捷

長白港之捷

嘉靖四十年四月有倭船一隻倭賊六十餘徒登犯
先該海道副使譚 分布兵船在彼哨禦遇到隨遣
中軍把總艾升統督各官兵擒斬真倭首級六十二
名顆

霽衢之攻

嘉靖四十年四月有倭船大小二十餘隻倭賊五百

餘徒由覲山登岍攻城該所守禦指揮向桂督率該所官軍各用矢石火器敵死倭賊三十餘徒賊忿不
退拆毀蔡世揚墳庵屯劄教場絞梯三十餘張蜂擁
夏家山布梯攻打十分危急指揮向桂督率官軍都
茂功等奮勇死戰打死倭賊不計力屈勢窮下船開
洋去訖本年五月復有倭船五隻倭賊三百餘徒由
觀山上岍攻城該指揮向桂千百戶都茂功等督率
該所官軍各用矢石火器奮勇敵退各賊下船開洋
去訖

裘村朱家店戴舉湖陳之捷

嘉靖四十年五月內倭船五隻倭賊五百餘徒由湖
頭渡登岍突犯裘村地方該海道副使王 督率統
兵把總艾升等官兵擒斬真倭首級三百六名顆賊
見官兵勢勇遁往朱家店地方隨該把總艾升統督
官兵奮勇追剿擒斬真倭首級七十八名顆前賊勢
窮遁往戴舉湖陳地方又該把總艾升統督官兵擒
斬盡絕計獲倭首一百五十二名顆

劔山海洋之捷

嘉靖四十四年四月有倭船一隻屯泊在彼該海道
副使蔡 調發統兵把總艾升統督官兵犁沉賊船

擒斬真倭首級二十餘名顆餘賊溺死者不計其數
南旋綠鷹之捷

隆慶四年三月二十日有倭船三隻倭賊二百餘徒
在南麂等畧行使該把總胡震督領官兵追至南旋
下洋卽獲二船各賊下水生擒真倭三名斬首八顆
救回被擄民人三十五人二十八日又有倭船二隻
倭賊二百餘徒突至竹嶼該把總胡震及叅將下遊
哨兵船衝鋒戰至綠鷹下洋黎翻一船圍剿一船擒
斬真倭首級二十餘顆救回被擄男婦四十餘名口
五爪湖之捷

隆慶四年四月有倭船六隻屯泊在彼該海道副使
王督同叅將梅魁統率官兵陳典徐景星楊鸞等
率沉賊船二隻擒斬真倭首級二十餘顆溺死倭賊
甚衆救回被擄三人

南麂竹嶼東洛三礁之捷

隆慶六年閏二月二十四日有倭船一隻倭賊一百
餘徒在東洛南麂外洋行使該溫處兵巡道副使張
督同叅將胡震統督官兵周津伍奏等追剿擒斬
真倭首級三顆用火焚溺衆賊死者不計四月初五
日三礁外洋有大倭船二隻倭賊二百餘徒該叅將

海防集要 卷之十
胡震統督把總李春芳等官兵追剿犁沉賊船一隻
火燒一隻生擒真倭七名斬獲首級一十一顆救回
婦女四口小厮四人

大衢舉之捷

隆慶六年六月各區兵船將已收掣回關該海道副
使蒙 照得汛期將畢恐有廣閩倭船回島嚴督各
哨兵船再加哨禦本月初六日際有倭船二隻倭賊
二百餘徒在洋行使劫掠當該副使蒙 總兵朱
叅將孫鸞督率官兵徐景星等奮勇攻擊生擒真倭
一十五名斬獲倭首二十六顆餘徒溺水死者不計

其數救回被擄男婦八名口

鹿頭外洋之捷

萬曆二年四月十一日有倭船二隻倭賊一百五十
餘徒該台州兵巡道僉事王 督同叅將戚繼美統
率官兵王賜文等奮勇攻擊斬獲真倭首級四顆犁
沉賊船溺死無算

南鹿東洛外洋之捷

萬曆二年四月十一日南鹿外洋有倭船一隻倭賊
七十餘徒該溫處兵巡道副使華 督同叅將李希
周統率官兵葉歡等生擒真倭五名斬獲首級一十

六顆救回被擄人民一十九名彼時風浪洶湧卽用火攻燒溺水死者甚衆十五日東洛洋外復至大倭船一隻倭賊八十餘徒督遣官兵李春芳等擒斬真倭首級一十六顆溺死不計其數

浪岡陳錢海洋之捷

萬曆二年春汛該海道副使劉 照得漁船出洋東風甚勁恐各官兵沿襲故套屯泊近港以不登岸爲功又恐乘銳妄殺玉石俱焚祗圖多級邀賞因而申明禁約督哨遠洋隨於本年五月初二日哨見大倭船一隻入犯浪岡海洋約賊百餘該署總兵事副總

兵王尚文叅將艾升親督把總徐景星所部兵船殺衝犁斬獲真倭首級一十二顆餘賊連船覆沒本月初三日復有倭船二隻賊衆二百餘徒突進陳錢海洋搶劫漁船又該副總兵王尚文叅將艾升督發把總馬自道等兵船邀擊生擒真倭六名斬獲首級一十七顆救回被擄民人四十九名餘賊溺水死者不可勝計

漁山海洋之捷

萬曆三年四月十四日松海外洋有倭船一隻自東南行使內向該台州兵巡道僉事王 督同叅將楊

海防纂要 卷之十一
文統率把總王有麟等領兵追至漁山海洋犁沉其船生擒真倭四名斬獲倭首一十二級賊徒溺死者不計其數救回被擄漁人二十名

馬蹟山陳錢洋浪岡高家嘴東枯山五爪湖
白結山魚籠山八捷積谷山落花洋韭山浪
岡下八山五戰

萬曆三年春汛出師該巡視海道副使劉 會同總兵李 督同叅將徐正遵奉 欽差督撫軍門劉撫臨寧波經略調度及申嚴漁船鰲甲之法令其各帶兵器剿賊論功本年四月十五日據哨報有大小

倭船一十五隻約賊千餘在落花洋合鰲行使入犯比時總兵出蒲舉叅將出長塗督率把總徐景星等統領各哨官兵相機遠禦併力進剿是日又有大倭船四隻約賊二百餘徒在積谷山外行使官兵客寅等奮勇追及對敵移時傷殘倭賊數多逋誅東遁本日浪岡外洋又有倭船一十五隻官兵樊雲熊材錢潛宋大忠等與賊大戰竟日鏡箭齊發擊死傷者不可勝計各賊望東遁去二十二日陳錢海洋有倭船十餘隻約賊五百餘徒官兵徐景星錢潛楊貴熊材宋大忠王三錫等合力攻擊自午至夜分各放火器

海防集要 卷之十一
焚燒乘風衝犁沉其二船斬獲倭首一十六級生擒
從賊一名各徒被傷投溺者甚衆賊船解散我兵分
道進剿五月初一日在黃泥礮海洋哨見大倭船一
隻望大小七行使官兵陳仕賢徐全徐和等奮勇追
擊過茶山直至高家嘴賊被銃箭傷死者過半奪回
被擄人七名其各賊首級撞遇直隸兵船盡行邀取
去訖初三日在東枯山大洋追及倭船一隻官兵吳
昆等向前奪擊犁沉之斬獲倭首七級餘賊覆沒救
回被擄者一十二人又哨至下八山遇有倭船一隻
官兵徐景星等對敵追奔百餘里賊衆大敗忽遇颶

風各飄散訖初四日哨至五爪湖有大倭船一隻官
兵楊貴等攻擊犁沉其船生擒真倭七名斬獲倭首
一十九級被傷溺死者不計其數救回被擄人二十
三名又哨至蟹鉗海洋有倭船二隻官兵徐景星陳
應良等攻打追至韭山外洋官兵齊放銃彈倭賊傷
死過半已及收功黑夜霧迷各賊併船逃遁遺一空
船初四日又追至鶯窩白結山海洋有大倭船一隻
官兵樊雲等爭先對敵斬獲倭首四級生擒從賊一
名餘寇胥溺救回被擄一十二人又督哨長章得秀
于魚籠山洋斬獲真倭首一級樊雲等又於馬蹟山

搜斬真倭首三級十二日徐景星等又於浪岡外洋
斬獲真倭首四級救回被擄二人犁沉倭船一隻

馬蹟羊山漁船二捷

寧波府知府周良賓海防同知李槩呈稱四月十七
日有倭船一隻計賊一十四徒在於馬蹟海洋搶掠
漁船當被漁人何邦寵王景秀等奮勇對敵破其船
生擒真倭一名斬獲倭首四級餘賊溺死奪回原搶
漁船一隻本月二十七日又有倭船數隻前來羊山
海洋搶擄內有四倭跳上漁船被漁人李廷臣等執
梃對敵打傷三賊落水生擒真倭一名

徐公海洋之捷

萬曆三年五月初一日本洋有倭船一隻約賊五十
餘徒往西北行使該嘉湖兵巡道僉事王督同分
守叅將狄從夏統率把總韓沛等領兵攻擊斬獲真
倭首九級餘賊連船滄沒救回被擄人民一十一名

漁洋之捷

溫州府知府楊邦憲呈據漁戶彭六等報稱於萬曆
三年五月初四日本洋有倭船一隻計賊十四人前
來搶掠漁船當被六等拚命對敵斬獲倭首三級餘
賊盡殺落水

海防集要 卷之十
非山浪岡漁山三捷

萬曆四年春汛出師該巡視海道副使劉 會同總
兵李 叅將徐 督發官兵分布信地督撫軍門謝
撫臨調度至四月十八日官兵路宰客寅陳應良
等哨至韭山外洋瞭有大倭船一隻內向各督水兵
衝鋒攻擊生擒倭賊七名斬首一十三級奪獲倭
船併夷器二百四十五件又於本月二十四日官兵
徐九章樊雲宋大忠馬自道等哨至浪岡遠洋瞭見
大倭船二隻入寇約賊一百餘徒卽督官兵奮勇血
戰犁沉前船生擒倭賊五名斬倭首四十四級泮沒
者不計并獲夷器三百二十七件救回被擄漁戶二
十二人又於五月初五日官兵杜德輝江明等哨至
南北竺海洋瞭有異船一隻向內行使約有倭賊五
十餘徒卽督兵船追至漁山插鼓筆架海洋各用火
器攻燒賊船擊賊下水比因銳驚龍起風洩大作止
撈斬倭首四級餘賊盡皆泮沒并獲在船在水夷器
二百一十八件

金齒外洋之捷

萬曆五年四月二十一日該分守寧紹徐叅將差旗
牌官裘良用等督率昌國把總邵岳哨總杜德輝等

哨至金齒外洋見有倭船一隻向東南行使官兵奮力攻打斬獲真倭首級八顆救回被擄漢人三名并獲夷器二十件遇夜賊船撞礁湮沒

積穀海洋之捷

萬曆八年四月十六日該分守寧紹盧叅將督同昌國把總陸邦彥哨總陳夢斗等巡哨韭山外洋瞭見倭船一隻約賊三十餘徒由正東向西行使隨督兵船追至積穀海洋犁沉其船因天晚雷雨洶湧止鈎斬真倭首級二顆及撈獲夷器八件餘賊溺水不計

東霍外洋之捷

萬曆八年四月二十四日該分守寧紹盧叅將巡歷長塗鼠狼湖等處督令中正遊哨把總詹斌錢潛哨官張世澤丘鳳等巡哨東霍海洋遇見大小倭船三隻官兵攻打犁沉賊船斬獲真倭首級共二十五顆夷器二百九十餘件小倭船一隻餘賊溺水不計其數

西磯洋岐六嶼海洋之捷

萬曆八年四月該松海備倭把總馬繼武先於本年二月內遵奉兵巡溫處道僉事唐台金嚴張叅將軍令統率大小船隻在於南北海洋往來巡邏至四

月二十四日哨至西磯山名蟹鉗頭信洋犁沉真倭船一隻擒獲一隻生擒真倭一名斬獲首級一十三顆投溺者不計二十六日又該把總馬繼武遊哨山名洋岐海洋有真倭船一隻形若海滄督率哨官王慶龍顧汝濟兩相攻擊賊見我兵勢大難支遂各帶刀投溺下水不計其數生擒魁倭二名斬獲首級一十七顆二十八日把總馬繼武督同中軍把總石光遠在於六嶼海洋生擒真倭一十名斬獲首級二顆通共生擒一十三名斬獲首級三十二顆俱經解赴本道轉解 督撫軍門吳 驗實題請 欽賞六日

三捷勒碑見在

東洛海洋之捷

萬曆八年閏四月二十三日該分守溫處叅將潘清督率中軍胡大經統船於東洛海洋哨遇倭船一隻約倭百餘徒官兵奮勇擒獲生倭一十二名首級一十二顆救回被擄人三名

橫坎門外洋之捷

萬曆十年三月二十一日該分守溫處叅將沈思學督率黃華關總哨王龍統船橫坎門外洋哨遇大小倭船二隻賊百數餘徒官兵對敵傷死王龍賊船追

海防彙要 卷之十一
至靈昆海塗督調標營把總馮汝員官兵攻剿擒獲
生倭二十六名從賊一十九名夷婦二口首級五顆
倭船二隻夷器一百五十三件

花腦浪岡之捷

萬曆十七年三月初二日該分守寧紹吳叅將督率
中正遊哨官兵陳夢斗錢潛等巡哨花腦大小盤等
洋遇有賊船二隻奮勇攻剿犁沉賊船生擒真倭一
名斬獲首級二十顆奪獲夷器一百十二件餘賊溺
死者衆至本月初四日又督定海北哨總劉應科正
遊總張必儒中遊把總詹斌等巡哨浪岡海洋賊有

草苫大倭船一隻追出遠洋奮勇夾攻龍風猛作官
兵冒險鏖戰生擒真倭五名斬獲首級二十八顆奪
獲夷器一百三十五件

洛伽外洋之捷

萬曆二十九年三月二十九日該分守寧紹陳叅將
督同正遊哨趙應科定南哨哨官韓克華等巡哨洛
伽山外洋過有大烏尾小草苫倭船二隻合力攻打
犁沉草苫船一隻倭衆約二十餘溺水傳令不許取
級併追大倭船忽遇雷風迤遁據船兵錢美等撈斬
真倭首級一顆并獲倭衣二件倭箭五枝及輕傷兵

王國等十二名

東霍之戰

萬曆二十九年四月十五日該分守寧紹陳叅將督同中正遊哨把總陳雲鵬張應試等巡哨東霍外洋驟見草苫大倭船一隻各督唬船追剿我兵以佛狼礮火箭等項攻打賊船鳥銳倭箭射兵捕兵間有被傷陣亡傅國定辛子儀火兵桑有益我兵奮力合攻直抵黑水下洋夜深海燿賊船遁去

東洛外洋之捷

萬曆二十九年四月十九日犯夷熊善達等駕倭船

一隻約倭七十餘徒乘帆向東洛下洋望東南行使哨官張邦達隊長狄龍等瞭見飛報溫處兵巡道按察使湯署叅將事都司孫蓋臣卽督官兵葉得春等駕船追賊逼近亂發矢石銳炮四圍攻打賊亦放銳矢對敵自午至酉賊見我兵兇猛勢難抵敵亂竄下水當生擒活倭一十九名并獲倭仗呈解督撫劉批行三司各道會官譯審賊夥黃維等吐稱夷犯熊普達等海中劫擄米貨殺死客商三人情真林元等勾引事實會同按院馬看得渺茫一海華夷共之漁商牟利餌賊島夷以乘汛擾我所從來矣自

海防集要 卷之二
關曾有事朝鮮海上數年絕警及釜倭遁而島夷鄰
東南者漸有覬心去年使船突來狡謀已兆今歲分
鯨流劫狂態益張况其器利船堅大非昔比官兵卒
遇技力難施聲聞內地羣情已自驚惶萬一隄備不
嚴縱令闖入其貽害誠非小小者今幸沿海妥地預
防惟謹而溫區官兵遠哨遇敵合圍攻打縱火焚擊
以致燬其來船溺其倭衆生擒一十九名具 題處
分以靖海邦 已上俱海防類考

漳泉之捷

萬曆二十九年春在晉入閩抵泉州受事代庖巡守

漳南道二篆履任後卽徃建南謁大中丞金公旋至
省會而倭報紛紛至矣倭掠漁船挾漁人扶櫓碎槍
方盛兵船寨遊及沿海郡邑戒嚴賊揚帆海上出沒
島嶼間縱橫亡敵時巡海乏人而中丞公又以 請
告候命境上距海千有餘里聲聞遼絕當事者乃以
巡海符授之不佞請得便宜從事三辭不獲而南北
中三路傳箭如雨羽書告急軍機喫緊間不容髮省
會同事諸公謂余當亟歸道署周行海上纔出省而
王和兵船被搶又見告矣官軍臄胸百兵不能當十
賊而小垵海壇南日輒追風逐影夸詡以稱勞苦而

寔退卻不前擇其尤者一二以按軍律而將與卒知
有進生退死之法賊與兵船遇輒蹈刃跳躍鋒不可
接授指知兵健將衝其尾犁其柁焚其檣火箭火箭
火桶乘風縱發一中賊船無得全者而又密啓機宜
出奇用間籌畫調度夜不成寢或漏下三鼓而傳門
接報報至無不令人錯愕應酬決判手腕幾脫叮嚀
告誡唇胷欲枯書生白面以當金革八閩內地岌岌
乎殆哉自有東旋一捷而馘斬強倭甚衆致生囚于
帷幄俘獻軍門已而銅山南澳相繼收功賊始知漳
泉有備嚴不可犯不敢正目窺閩南而寨遊將士各

有疆立之志皆東旋爲之作氣也大將軍鎮福海不
能展一籌而時時譸張聲勢以難文臣不佞日受其
絮聒謂船小不能制勝勒令採木辦福船木料不可
卒得得亦不能刻期鳩工工成亦未必可駕以禦賊
爭之不得余乃盡括寨遊福船七隻聽其調度而賊
操輕舟如飛轉旋甚捷樓船安所用之南路募兵漁
船與鳥船混合擊賊帆檣號色雜出賊不及覺而疑
徧海皆兵賊故不能大得志漳泉而宵奔東粵是歲
粵海大創所損兵船亡筭當倭之猖獗也大將軍馳
檄選精兵結踪踞上游擊賊余謂大海淼茫隨風飄

泊水師與陸師異陸師可據險扼其吭而拊其背船
師詎可聚乎賊所獲漁人靡不爲其嚮導者必避實
擣虛兵抽則防守弛憂在內地矣且客兵從招募何
分強弱弱卽當汰不可爲兵愚不敢奉將軍令無已
請將別鎮挑選毋及漳泉漳泉兵不受選沿海星燧
羅列六月五日異風拔木白浪躍空山搖海沸倭船
飄至永寧傍岼泉民携老挈幼奔湧入城諸弁以介
冑見桴鼓聲震請守陴堵賊余下令先發健卒從城
外探賊入犯路亡何海上報至將士奮勇死戰犁船
沉倭登岼者駢首就擒泉得亡恐而福寧精銳結紵

海島不能致一倭而閭峽之圍賊登陸焚掠省會震
驚飛檄救援賊聞援至旋退有天幸焉計大將軍所
俘獲倭二一斬級病死興海無功福與福寧有失而
所擒獲生倭斬級皆漳泉戰士力也澎湖之設有遊
兵孤危四絕去漳海甚寥廓緩急不能揀援大將軍
告予亟傳令撤回守內地不撤全軍必覆問之叅軍
及將士皆怨患愚謂大將軍及諸將士言良是然往
返必候風傳令下海安得順風往順風歸五百人守
彭山山可守湖可泊絕其樵汲擊其惰歸倭且有後
虞彼五百人更相爲命倭未可卒下也且倭志在擄

掠窺內地子女財帛攻彭山何益耶萬一船出彭湖
飄零汪洋巨浸中東西不相顧首尾不相接舟必爲
倭有矣彭湖兵可毋撤而將兵者意在必撤兵符已
先發矣余亟傳令止之兵覆請以身任大將軍無奈
予何已倭從東粵標掠揚揚得志縱蒿東歸而彭湖
兵乘其懈而邀擊之沉船破釜所繫頸皆名酋是役
也其倖不出于大將軍之計慮者幾希耳倭出南澳
張定兵船被擄去幸有浯銅遊兵追擊奪船歸而捨
船之倭盡被浯銅兵殲戮此可稱漳海奇功而把總
方某欲揜其否臧失律與浯銅攘臂拔劍擊在一軍

盡爲左袒不欲當失事之名反唇相刺事聞兩院余
謂浯銅南澳一體然不當混功過以死將士心條上
勝負情形勘斬級一一解赴軍門及直指使者按驗
驗畢請封置他郡毋發歸于時抹回被擄多人活口
質證爭功者慙沮武弁妬功忌勝彼此媒孽變黑爲
白有不勝其簧鼓者愚獨秉公心罪必核功必錄勞
不至泯欺不至售庶幾無負當事者委任之殷奈之
何懦師債帥倏忽轉遷而有功如沈有容張萬紀其
人者與望風縮首之輩同類共律蓋功冊成于余手
穎頽指繭而新海道受事更削牘爲之其中低昂軒

輕余付之不問 題疏發而不孝且憂奔歸里矣余
署漳南巡篆直至五月交代而是月之終海波已恬
始事者與終事者埒而庖代三符者與手握一符埒
大將軍坐鎮以二首功受上賞陞實級官都督沐世
恩而余以豸豸之勞無裨實用而猥受 賚金進秩
其爲大將軍之提挈多矣是役也沉犁倭船九隻奪
獲賊船并兵漁船十六隻生擒倭賊四十二名斬首
八十六顆獲從賊首十五名救回被擄一百六十四
名奪獲器仗一千二百九十三件皆出漳泉部下事
載撫院題疏及直指勘功疏中 王在晉記

附獲夷紀略

交趾夷

萬曆三十九年六月天風焱駭海颶飛揚溫州叅將
沈有容報獲異船者三初獲爲裴暴等七十三名內
裴福寧黎光武楊文仁少知書字自供爲阿南國升
華府河東縣人五月奉上官差往長沙葛黃處薦禮
祭祀一神而被風者再獲爲武文才等二十五名內
陳陽科少知書字自供爲升華府河東縣人六月往
歸仁府維遠縣販賣飄至海中爲庄昭所劫而被風
者三獲爲弘運等三十七名并瑞安縣獲解稱文稜

等五名共四十二人內陳光袍何玉榜少知書字自
稱為升華府濰川縣人五月就富安府裝載官粟併
各物回本營而被風者阿南為安南國其君黎姓後
莫姓繼之今復歸黎國有五道四宣二處京都城市
有古殿舊跡人皆被髮裸下足盤屈蹲踞為恭聲音
莫辨飲食無分生熟所奉上官令為欽差節制各處
水步諸營兼總內外同平章軍國重事太尉長國公
又鎮南營都督府掌府瑞郡公雄義營端國公國人
讀孔孟五經四書念南無阿彌陀佛男女行大小禮
嫁娶婚姻以時問衆人有妻子否曰有妻子問思歸

否則泣下不敢言裴福寧自稱為校生通三場其人
舉止迂濶大類老儒押韻吟詩有也知 上國施仁
政生養恩深荷 九重之句督撫浙江軍門高 發

按察司署司事叅政王在晉審明具疏題 准遞歸

兩廣總督送回本國

四十年十月十二日有安南國都統使黎維新印信領狀

朝鮮漁人

萬曆三十九年九月台州叅將方矩獲朝鮮男子四
婦二孺子一男子俱同姓李大李漢隊為同生兄弟
而李三其親叔也李四與孺子李小一為同生兄弟
婦計氏年三十有二為李大之妻金氏年二十有九

爲李漢隊之妻各長其夫一歲俱未生育五男子一族爲朝鮮全羅道南原府濟州康津縣人男子草笠大帽婦緝髮加于額人貌樸野推曾而言語侏儻卽譯者不能暢曉有帽匠李大挺者爲朝鮮人寓于杭州呼而庭譯之應對如響李大漢隊之父曰李萬石李四小一之父曰李蠻固萬石尚存譯其蠻音父曰阿鼻叔曰三寸兄曰勝妯娌曰阿姊名子曰阿得康津海溼男子持竿婦女操舟或釣而網或餌而漁取生鮪魚國中價貴肉附于殼今猶有乾魚帶殼者以布束纏于腰漁者每人挈米二斗爲半月糧取水一船

共十數石下海採捕或十日而歸半月而歸本年八月二十五日男婦往東海取魚駕舟下椗二十八日上燈時遭風桅損舵壞任風飄蕩昏夜迷路不知所之船底平得不歆覆船中水盡取海水食之有火石火刀取火供爨度命至九月二十一日到靜寇海門乃爲哨捕獲焉督撫浙江軍門高 發按察司署司事叅政王在晉審明具疏題 准遞回本國轉發原籍安置

飄倭

萬曆四十年八月十四日台州叅將方矩獲解倭夷

哈哪哩等十二名倭婦烏般薩一口并草撒船一隻
船中有日本草蓬草苫等件七首刀鞘一件乾飯一
撮驗得各倭頂髮開塘外髮稍長臂有刺紋下體光
陰又于身內搜出倭衣五件倭布一疋倭婦身上搜
倭旗一面試以語言相顧駭愕試以物應對如譯書
問所居曰右南哥隸于右雞哪什馬其酋長爲拖哪
右南哥輸糧于右雞哪什馬而拖哪掌之其輸糧每
年輸差右南哥六十餘家壯者百五六十人人種田
五畝納米一斗所載米十七包黃麻十二包遭風投
水船中僅存炒米一包爲食海水不可飲則張布接

示承雨攪水得不渴所帶麻布三尺爲招風旗拖哪
之所給也女人進香于哈密弗多結搭船同行飄至
鹿頭外洋弃船登岍爲官軍所獲督撫浙江軍門高
發按察使王在晉會勘審非入犯議將獲倭分發
各營具疏 題請各倭旋相繼以斃

止存烏東家一
名發營收養

軍行

一軍未發前三日下令收拾行裝鞍勒乾糧鞋履器
械一一足備聽令而行不可使預知所往泄漏事機
一發軍日不拘時分但聞第一盪喇叭響收拾軍裝
第二盪喇叭響整隊棚立第三盪喇叭響啓行各哨

先令馬軍一半在前一半殿後各隊步軍依次隨行如出郊外須令熟知道路夜不收及遊兵前引左哨行左路右哨行右路前哨行中路之先中軍行中路之中後哨行中路之末每隊相去一百五十步如遇山路窄狹不能並行者前哨三隊先行左哨三隊次之右哨三隊又次之如此輪流遞爲一路不許攙越停擁至寬平處仍照前三路分行不許斷隔違者治以軍法

一凡行軍須令遊兵前持五色旗遇溝塹開黃旗遇谿河開黑旗遇林木開青旗遇賊開白旗前後遞相傳開掌旗官失於瞭望者痛決一百因而悞事者依律處斬

一經過城堡鄉村鎮店不許縱軍離陣驚駭人民強買物貨飲食奪人乘騎如有違犯定依軍法處治

一軍行步兵在前騎兵在後如遇大雪騎兵在前步兵在後

一軍行遇大雪大雨人馬寒凍兵器濡濕者卽宜擇地駐劄申嚴隄備待天晴道乾方可行兵如欲攻其不意不備者不拘

一軍行遇大風逆來吹揚灰沙撲人面目者不可進

海防集要 卷之十
兵宜擇地下營以防不虞若風從右背來者是助我軍宜急進兵然崔浩因逆風而旁設伏兵待賊過發伏擊之取勝是謂以權佐攻也

一軍行前有賊兵守我要害斷我歸路宜引兵避之別求其便或用車營塞其險隘固我人馬且戰且前用飛槍神砲弩勁兵奪其要害破其困扼可以制敵取勝

一軍臨賊境遇關山險隘及三岔川口先令遊兵於最高處四面卓望或路傍有深林幽谷草木蒙密去處須令短兵於內搜索果無姦伏卽回報主將挨次

整隊而行

一前哨軍遇賊卽於當脚下先占高平之地堅立以待遞報中軍聽其相機調度此時如有回頭移足悉以軍法重治退後者卽係臨陣先退依律處斬

一渡水先令水手前行探其深淺如有水深卒無船筏卽用大索數條於兩岍林木或用椿橛上繫定先令乖覺十數人攀索過水登高遠望果無藏伏方令各隊將旗槍刀每十條爲一束或於近便處採砍竹木作排筏下排刀槍上鋪衣甲用大環穿於渡索上以聯其筏令先過者於岍上揸曳過水或用大甕絞

作罌筏或用羊皮渾脫皮囊饜草於內令實繫作木筏渡人尤妙俱要挨次而行不許攙越

安營

一 下營之法擇地爲先地之善者左有草澤右有流泉背山險向平易通達樵牧謂之四備居山占其高陽居水占其上流大約軍之所居就高去下向陽背生兵法所謂養生處實軍無百疾居山之左備山之右居山之右備山之左居山之陽備山之陰居山之陰備山之陽不居無障塞謂四通八達之道受敵益多不居深草恐有潛襲或被火燒不居水衝恐有漲

溢或被決壅不居無水及死水恐渴飲致病不居無出路謂四面地隘恐被圍難解及糧運阻絕不居無草萊恐軍乏絕不居下濕恐人生病軍馬不利不居廢軍故城久無人居者恐被兵圍生疾不居塚墓間與鬼神共處春夏宜居高而無暴水秋不居溝澗深谷慮有洪潦兵法有曰山中之高謂之天柱澤中之高謂之地柱高中之下謂之天獄低中之下謂之地獄斥鹵之地草木不生謂之飛鋒故村虛落荒城古砦謂之虛耗川谷之口乏木無草謂之天竈穹隆鐵背四面平坦謂之沃焦亦名龜背神祠社木謂之天

社丘陵之上大山之口謂之死地大山之端謂之龍頭凡此地皆不可安營安營皆隨地形而設寬平處卽布方營半險半平處卽布偃月營先計人數列營幾重配地多少隨其衆寡一人三步使隊間容隊寧使剩隊不得少隊如有剩隊則均分四角或中軍以備急用

一軍行將欲止舍必先令遊兵於營四旁高阜處整隊駐劄就差乖覺四遠哨探一則以防敵兵一則以遏走遁及待營內卓幕以定各守信地訖看中軍發起火三枝則諸軍方許撤隊入營或有瞭見聲息隨

卽放砲候主將號令相機應敵

一營邊如無水者以地生蘆葦水草之處及地有蟻穴其下必有伏泉可開井取水及尋野獸踪跡去路不遠有水如軍遇緊急備水隨行者須用羊皮渾脫盛之或大葫蘆亦可

一四外要害去處裝塘伏路者每更輪流三人於道傍防候如有細作潛來偷管切勿驚叫放賊過塘遠遠暗襲至第二塘以裏後無賊兵相繼者卽與答號密切掩捕不許喧噪

一臨賊境凡採薪汲水牧放未出之先須用遊兵四

遠架梁見賊卽便放砲使知迴避

一營壘已設警備再爲量分遊兵於營外四面要害去處每處給與鼓砲隱於幽僻之所或園林村曠之中如夜有賊來犯我營壘者前項伏兵卽從後舉砲鳴鼓而出以攻其背如此賊必警疑潰散

一凡遇賊夜來犯我營壘不得已而與之戰其法在於立營之制也立營之法與布陣同蓋止則爲營戰則爲陣大陣之中必包小陣大營之內必包小營前後左右諸軍各自有營大將之營居中諸營環衛隅落鈎連曲折相對再於各隊量抽短兵於營外五十

步內裝塘如賊至塘所佯爲不知放賊過塘遐遠然後放起火一枝營內軍士皆起披執兵刃禁聲安坐以待敵至卽舉四角烽堠照耀營壘我軍於暗處伺立但見來者便以弓弩槍砲齊擊截其歸路奮勇疾戰如此則賊可擒也

一賊入隘口待十過其四五我從後傍截之如賊驚亂則奮兵擊之必勝

一賊出隘口來鬪候其半出速馳赴之左右夾攻再遣精兵由間道奪其高險以銳弩火箭下瞰攻之可以全勝

一賊入境侵掠且按兵治力待其將退度其歸路從
間道潛出精兵據險設伏再以大軍躡其後候賊入
伏乃鼓譟而前奮力齊攻必勝

一賊衆我寡須要避易就險或乘其陰霾昏夜及潛
伏林莽設爲疑兵隨形應變擊之勝

一賊入境內初來氣銳不可當頭截殺俟其四散槍
掠其衆必分我當潛兵於鄉村擊之或待其將歸預
爲分兵伏於歸路從三分之二以邀攻之則勝

一軍行山峽之間卒然與賊相遇道路窄狹雖衆難
用當命冒刃勇力之士先鳴鼓大譟而乘之以短兵

接戰再遣健步精兵潛登岩岨險阻夾攻古人以此
爲谷戰譬如兩虎鬪於穴中猛者必勝

一我軍爲敵所圍斷我前後我欲突圍而出必當以
步兵居內車騎長笏手鎗手刀手相參居外前後以
長鎗大牌補空分爲三部各部勇戰突之出圍仍合
一處互相犄角擡陣緩行慎勿驚亂

一與敵遇於深林之內當視林木疎密疎處則布驕
兵雜於鎗牌密處則布短兵各以奇正更戰更息此
謂林戰之法也

一敵人遠來疲勞可擊方食可擊天時不順可擊地

刑未得可擊亂行可擊

一敵若於高山大隴揚兵而行者必別有精兵將由間道攻我不意我當置望樓遠瞭或有塵起鳥驚之處當潛遣精騎先於來路據險設伏待其至而擊之一敵若乘其風雪飄翳故令偏師來攻待我應之彼必佯爲敗北此欲誘我入伏也我當勒陣緩追潛於軍後多選精兵從賊來路及度其歸路密切覘望如有伏兵卽分軍爲三四潛入伏所互換攻擊若彼伏兵敗走我軍就彼伏定待彼來誘我者入伏卽起而攻之

起營安營規度

凡行營須待大營旗纛起行或聽駕前銅角聲各營方許起行每日下營量撥步軍或五隊十隊馬軍五隊或三四隊步軍披甲馬軍不摘鞍伺候長圍及架砲者布列已定方許入營休息有盜人衣糧諸物及盜騾馬宰殺并檢括隱藏人遺失物者俱斬知情首告者給賞知而不首者同罪若收得馬驢騾馱者卽送該營轉送大營召人識認如有遺失被後哨官軍收獲者收役官治以大罪

凡將下營未定之時須撥幾隊人不解甲馬不解鞍長圍架砲先定然後入營休息及嚴謹營不偷

盜然後營自整也
以上俱兵法所未載者故表而出之

禁誼

凡兵體尚靜惡誼靜則有序誼則必亂其軍行在路若耍喚人及進退止息令每隊取曉事者兩人一人執小緋旗子於本隊外傍行去隊十步以爲望一人專聽待喚如去賊近卽遞相暗報欲令止息卽卧旗子當隊下卽住候見旗立即速行或耍抽退令旗子不住前招當隊回身速行其大軍首尾亦各差小校領主將處分他人不得輒傳聲

度險

凡軍行入山林翳蒼之地防有伏兵先須選趨健三百人於險阻不防之處偷路過把其出道又選驍勇當道索搜或自高山樹杪使人遠視審無藏伏分兵前後以爲堵截然後遣輜重先渡以步兵繼進其濟水亦如之 凡遇坑穴闊三五丈人馬不可通卽令軍中每人把一木橛子及一束薪芻之類遽傳填之立可渡 凡遇峭崖峻壁之阻則以接梯倚其壁選趨健者手執鈎竿身繫二繩索緣梯竝勾木石而上至半穩處卽繫繩於木垂兩頭至地繫橫關爲軟梯與衆軍攀緣并續加繩索及縋人登之

出隘

凡軍行賊境若逢山水窄隘橋梁濟渡須防壅遏自相蹂踐及爲敵人邀截先令左右廂虞候各領第一隊過便於兩邊卓隊排陣以爲防守次第二隊過以次排立第三隊亦如之餘軍亦準此待末隊過盡卽左右兩廂對行引發如非賊境卽軍伍相連緩行過渡依常引發仍置斥候遠望如前法

齎糧

夫千里饋糧士有饑色樵蘇後爨師不宿飽况深入敵境飛輓不通襲師及寇益資擬備雖云因糧於敵

亦虞清野以待舊法人持乾糧三斗可用數旬若班師在道去境猶遠儲貯乏絕卽須揀擇羸瘦牛馬應卒以充軍食庶全人力不至爲賊困逼 舊法米一石取無穀者淨淘炊熟下漿水中待水曝乾淘去塵又蒸曝之經十遍可得二斗每食取一大合先以熟水浸之待濕徹然後煮食之一人可五十日 鹽三升以水和入鍋中炭火燒之卽堅小不消一人食可五十日又宜夏月遠行 粗布一尺以一升醃醋浸曝乾以醋盡爲度每食以方寸煮之可食五十日 取小麥麩作蒸餅一枚浸醋一升或作斗曝乾以醋盡

爲度食每梧桐子大煮之人可食五十日 豉三升
搗如膏加鹽五升捻作餅子曝乾每食如棗核大以
代醬菜人可食五十日 米麩一升人食可一日
牛一頭食之五十人可一日 馬一匹食之五十人
可一日驢一頭食之三十人可一日 如更急難諸
戎裝用皮者亦可煮食救饑 山行卽採松皮每十
斤與米五合煮之食爛熟半斤一人可食一日 每
人將油麻半升如渴取三十粒含之立止 烏梅乾
啣口中亦可止渴 每人將葫蘆或竹筒皮槥可受
一二升者料前程之水卽盛行 馬軍每人將乾酪與

馬恐馬渴乏 邊兵遠行則有糜餅皺飯麩雜餅之
類糜餅用糜末作麩投沸湯和爲餅厚一分候冷切
作碁子曝乾收貯如在營砦內以湯沃而食之如路
行及戰陣中乾食之味美不渴愈於雜餅皺飯麩並
製如常法惟曝極乾令可齋持及久

斥堠聽望

凡軍遣候吏必擇精明勇敢奇謀遠慮者令彼鄉國
之人引導而往或刻獸足卽中路爲却行之狀或土
冠微禽而隱伏叢薄之間蓋欲密聲晦迹惕人知覺
然後傾耳而聽專目而視諦伺它物以迎知敵人之

海防纂要 卷之十
精故見水痕則知敵濟之早晚觀樹動則驗寇來之
馳驟衆草多障者使我疑也飛鳥不泊者下有伏兵
也駭獸奔逸者謀潛襲也敵來之伏餘見察敵形門凡此之類皆
可察而預知之必待逢敵之軍而後用其耳目則不
能及矣若師行斥墩多擇高要之處察望四邊前探
不得推後探以爲鋒左矛不得望右矛以爲固是以
軍行軍止必先謹聽候之法也

探旗

軍前及左右下道各十里之內五人爲一部人持一
白幡一絳幡見騎賊舉絳幡見步賊舉白幡傳語後
第二第三部諸王者白之賊百人已下但舉幡指百
人已上舉幡大呼王者遣疾馬往視

探馬

軍行前後及左右五里著探馬兩騎十里加兩騎十
五里更加兩騎至三十里用十二騎前後爲一道其
最遠及以次遠者各等第揀壯馬給與之馬弱則恐
爲賊所擒若兵多發引稍長卽路上更量加一兩道
其乘馬人每令遙相見常接高行各執一方面的旗無
賊則卷有賊則舒以次遞應至大軍大軍見旗展則
知賊至庶得擇利設機應變迎前出戰也

遞舖

凡軍行去營鎮二百里以來須置遞舖以探報警急務擇要逕使往來疾速平陸別置健足之人水路亦作飛艇或五里或十里一舖從非寇來之方亦須置之

行烽

凡軍馬出行擬停三五日卽須去軍一二里以來權置行烽如有動靜舉烽相報其烽并以賊來要路每二十里置一烽連接至軍所其遊奕馬騎晝日遊奕候視至暮卽移十里外止宿防賊徒見烟火掩襲烽

人其賊路左右仍伏人宿止以聽賊徒如覺賊來卽舉烽遞報軍伺賊十騎已下卽舉小炬火前烽應訖卽滅火若賊百騎至二百騎卽放一大炬若三百騎至四百騎卽放二炬若五百騎至千騎卽放三炬準前應滅前烽應訖卽赴軍若虜不到軍卽且抵山谷藏伏旣置燿烽軍內卽須置一都烽應接四山諸烽其都烽如見烟火忽舉卽報大總管某道烟火起大總管當須戒嚴收保遣差人斥探

已上出武經總要

海陽集

卷之十

三十一



